



Komisija za očuvanje nacionalnih spomenika, na osnovu člana V stav 4. Aneksa 8. Općeg okvirnog sporazuma za mir u Bosni i Hercegovini i člana 39. stav 1. Poslovnika o radu Komisije za očuvanje nacionalnih spomenika, na sjednici održanoj od 3. do 9. maja 2005. godine donijela je

ODLUKU

I.

Grobljanska cjelina Alifakovac u Sarajevu proglašava se nacionalnim spomenikom Bosne i Hercegovine (u daljnjem tekstu: nacionalni spomenik).

Nacionalni spomenik čine groblje Alifakovac sa turbetima i česmom.

Nacionalni spomenik nalazi se na lokaciji označenoj kao k.č. br. 288, 289, 290, 444, 445 i 333 (novi premjer) k.o. Sarajevo IX, što odgovara k.č. broj 97 Mahala XCIX Sarajevo, k.č. broj 57 Mahala CIV Sarajevo, k.č. broj 112 Mahala CV Sarajevo i k.č. broj 113 Mahala CV Sarajevo, upisan u zk. uložak br. CV/68, CV/39 i CIV/68 k.o. Sarajevo, Općina Stari Grad Sarajevo, Federacija Bosne i Hercegovine, Bosna i Hercegovina.

Na nacionalni spomenik primjenjuju se mjere zaštite utvrđene Zakonom o provođenju odluka Komisije za zaštitu nacionalnih spomenika uspostavljene prema Aneksu 8. Općeg okvirnog sporazuma za mir u Bosni i Hercegovini ("Službene novine Federacije BiH" br. 2/02, 27/02 i 6/04).

II.

Vlada Federacije Bosne i Hercegovine (u daljnjem tekstu: Vlada Federacije) dužna je osigurati pravne, naučne, tehničke, administrativne i finansijske mjere za zaštitu, restauraciju, konzervaciju i prezentaciju nacionalnog spomenika.

Komisija za očuvanje nacionalnih spomenika (u daljnjem tekstu: Komisija) utvrdit će tehničke uvjete i osigurati finansijska sredstva za izradu i postavljanje informacijske ploče sa osnovnim podacima o spomeniku i odluci o proglašenju dobra nacionalnim spomenikom.

III.

S ciljem trajne zaštite nacionalnog spomenika, na prostoru definiranom u tački I stav 3. ove odluke utvrđuju se sljedeće mjere zaštite:

- dopušteni su samo radovi na održavanju i uređenju groblja, konzervatorsko-restauratorski radovi na starim nišanima, turbetima i česmi, kao i radovi čiji je cilj prezentacija nacionalnog spomenika uz odobrenje federalnog ministarstva nadležnog za prostorno uređenje (u daljnjem tekstu: nadležno ministarstvo) i

uz stručni nadzor nadležne službe zaštite naslijeđa na nivou Federacije Bosne i Hercegovine (u daljnjem tekstu: nadležna služba zaštite);

- dopušteno je postavljanje novih nišana na postojećim grobnim mjestima koji svojim oblikom, materijalizacijom i dimenzijama neće ugroziti izgled groblja, niti oštetiti stare nišane;
- obustaviti daljnja ukopavanja na groblju Alifakovac zbog ugroženosti starih nišana;
- urediti groblje prema odgovarajućem projektu, uz odobrenje nadležnog ministarstva;
- osigurati redovno održavanje lokaliteta;
- nacionalni spomenik bit će otvoren za javnost i može se koristiti u edukativne svrhe.

Utvrđuju se hitne mjere zaštite:

- izvršiti vađenje, čišćenje i konzerviranje triju nišana-stela koji su potonuli u zemlju;
- izvršiti konstruktivnu sanaciju turbeta.

Utvrđuje se zaštitni pojas koji obuhvata susjedne parcele koje graniče sa prostorom definiranim u tački I stav 3. ove odluke. U zaštitnom pojasu provode se sljedeće mjere:

- nije dopuštena izgradnja novih objekata, dogradnja postojećih, niti izvođenje radova koji mogu utjecati na promjenu ambijenta;
- dopuštene su sanacija i adaptacija postojećih objekata;
- sve intervencije mora prethodno odobriti nadležno ministarstvo.

IV.

Stavljaju se van snage svi provedbeni i razvojni prostorno-planski akti koji su suprotni odredbama ove odluke.

V.

Svako a posebno nadležni organi Federacije Bosne i Hercegovine, kantona, gradske i općinske službe suzdržat će se od preduzimanja bilo kakvih postupaka koji mogu oštetiti nacionalni spomenik ili dovesti u pitanje njegovu zaštitu.

VI.

Ova odluka bit će dostavljena Vladi Federacije, nadležnom ministarstvu, nadležnoj službi zaštite i općinskim organima uprave nadležnim za poslove urbanizma i katastra radi provođenja mjera utvrđenih u tač. II - V ove odluke i nadležnom općinskom sudu radi upisa u zemljišne knjige.

VII.

Sastavni dio ove odluke je obrazloženje sa pratećom dokumentacijom koje je dostupno na uvid zainteresiranim licima u prostorijama i na web-stranici Komisije (<http://www.aneks8komisija.com.ba>).

VIII.

Prema članu V stav 4. Aneksa 8. Općeg okvirnog sporazuma za mir u Bosni i Hercegovini, odluke Komisije su konačne.

IX.

Danom donošenja ove odluke sa Privremene liste nacionalnih spomenika Bosne i Hercegovine («Službeni glasnik BiH» broj 33/02, «Službeni glasnik Republike Srpske» broj 79/02, «Službene novine Federacije BiH» broj 59/02 i «Službeni glasnik Brčko Distrikta BiH» broj 4/03) briše se nacionalni spomenik upisan pod rednim brojem 532.

X.

Ova odluka stupa na snagu danom donošenja i objavit će se u «Službenom glasniku BiH».

Ovu odluku Komisija je donijela u sljedećem sastavu: Zeynep Ahunbay, Amra Hadžimuhamedović, Dubravko Lovrenović, Ljiljana Ševo i Tina Wik.

Predsjedavajuća Komisije

Ljiljana Ševo

Broj: 06.2-02-127/05-7
4. maja 2005. godine
Sarajevo